



历代名士歌赞汉高祖刘邦作品选(二)

许砚君 辑

汉高祖赞

三国·夏侯湛

汉祖明达，兼容权武。
总御群雄，剪翦强楚。
奄正华夏，经略区宇。
遂登天位，纘尧之绪。

汉高祖画赞

晋·傅玄

赫赫汉祖，受命龙兴。
五星协象，神母告征。
讨秦灭项，如日之升。
超从侧陋，光据万乘。

咏汉高祖

唐·于季子

百战方夷项，三章且代秦。
功归萧相国，气尽戚夫人。

汉祖庙

唐·皇甫冉

古庙风烟积，春城车骑过。
方修汉祖祀，更使沛童歌。
寝帐巢禽出，香烟水雾和。
神心降福处，应在故乡多。

斩蛇

宋·佚名

皇统承尧运，朱旗启汉家。
未诛秦始鹿，先斩泽中蛇。

丰西亭

元·傅若金

遥山寂寂对危亭，坏础欹
沙柳自青。
四海久非刘社稷，千秋犹
有汉精灵。

高祖故宅

明·王正

汉高千古一英雄，
休笑当年马上功。
试问后来为帝者，
谁人曾出范围中？

过丰

张方平

刘季当年在古丰，芒砀王气已连空。
天机先露由啼妇，人意冥符自董公。
历数有归徒胜负，风云相会尽英雄。
不然樊酈萧曹辈，尽老屠商掾吏中。

读汉高帝纪

元·刘因

礼乐经秦扫地空，遗民洗眼续王风。
规模自袭挟书律，举措惟推约法功。
鲁国两生心独，新城三老义谁同。
只知才到萧曹尽，可信高皇是沛公。

汉高帝

宋·王十朋

百战功成汉业新，咸阳置酒问群臣。
区区高起王陵辈，岂识龙颜善用人！

二

仗剑崎岖起沛丰，祇将漫骂驭英雄。
虽然能用三人杰，已失商山四老翁。

汉高皇帝赤符颂

宋·洪适

汉受天命，承尧之运。断蛇著符，龙飞沛郡。赤帟禽歇，朱旗举秦。协于火德，为天下君。祚厄中叶，鼎移贼臣。皇干眷佑，复开真人。诞生济阳，赤光照室。嘉禾得名，龟兆告吉。吉梦维何，乘龙上天。王迹维何，火光赫然。佳气郁葱，伯阿所望。哀是灵贶，皆炎德祥。披翦荆棘，整齐乾坤。虓将拜手，请登至尊。有臣曰华，奉符来谏。惟我真主，名应图讖。四七之际，火实主之。系隆我汉，非君而谁？爰即高邑，践阼建元。王室再造，如障狂澜。氛荡八紘，烽销四鄙。黔首更生，仰父俯子。猗欤赤伏，实启中兴。敢绍吉甫，作为颂声。

斩蛇泽歌

北宋·贺铸

元丰甲子，余与彭城张仲连谋父、东莱寇昌朝元弼、彭城陈师仲传道、临城王适子立、宋城王玘文举采徐方陈迹分咏之，余得戏马台、斩蛇泽、歌风台三题，即赋焉。戏马台在郡城之南，斩蛇泽在丰县西二十里。

君不闻泗滨亭长送徒如咸阳，徒夫怀归多道亡。

泽中置酒饮相诀，
吾亦从此犇芒砀。
阴风萧萧导者惧，
前有修蛇怒横路。
酒酣拔剑肯留行，
划断蜿蜒不回顾。
河明月出人踵来，
彼媪何冤号且哀？
谓遭赤帝屠吾子，
语竟莫知安在哉。
真人闻此自心许，
茫茫四海吾其主。
虎变龙飞十二年，
馘项泉英盖狐鼠。
半夜雄鋌飞上天，
几见长陵一抔土。

本版上接2021年9月29日6版

注：本篇诸作摘自许砚君辑校《历代诗人咏刘邦》（中国诗词出版社2018年一印）

